

**Regional News Unit AIR Aizawl
Friday, August 02, 2024**

Date – 02/08/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- **Health Minister Pi Lalrinpuii chuan Kolasib District Hospital a tlawh.**
- **Damdawia a thlawna inenkawlna, Mizoram Health Care Scheme hman mek chu tun thla chung hman tura pawh sei leh a ni.**
- **Supreme Court chuan state thuneitute chu an state Scheduled Castes leh Scheduled Tribes (SC/ST) zingah a hnufual lehzualte qouta pe thei turin thu an nei a ti.**
- **India leh Vietnam chuan nimin khan thawhdunna tura inremna thuthlung MoU pakua an ziak.**



HEALTH MINISTER

Health Minister Pi Lalrinpuii chuan Kolasib District Hospital a tlawh a, thawktute a kawm a,

Minister chuan, Kolasib District Hospital chu OPD leh IPD a enkawl an neih atanga chhutin Aizawl leh Lunglei tih lohah Mizoram ah a san ber avanga ngaihtuah ngai bik nia a ngaih thu sawiin, 'Tun aia tam zawk Specialist te an neih a, Ward pawh mumal zawka an neih hunah chuan hmun dang pan ngai lovin damlo tam zawk an enkawl thei tawh dawn a ni' a ti a. Kolasib District Hospital a thawktuten mamawh an thlen tam tak chu tih nghal theih a nih lain a then chu la nghah ngai deuh turte an awm thu a sawi. Minister chuan Doctor te lakah mipuiten beiseina sang tak an neih thu sawiin, an tawngkam chu damlote tan damna leh thlamuanna tling a ni a ti. Chutih lain doctor thenkhat ruihhlo avanga hna thawk tha theilo an awm thin nia sawi awm leh zeuh thin chu pawh a tih thu sawiin, Doctor te leh nurse te chu taima taka an hna thawk chhonzawm zel turin a fuih.

Minister chuan, Chief Medical Officer Office leh District Medical Superintendent Office tlawhin a hmunhma chungchang te, thawktu indaihloh chungchangte, khawl lama an indaihlohna leh an harsatna hrang hrang te chu a theih ang anga hma laksak a tum thu district hotute hnenah a sawi a. Damdawi In-a ward hrang hrang fang kualin Kolasib District Hospital sak lai mek chu a hmunah a en nghal bawh a ni.

Minister tawiawmtu Pu Lalfamkima, Deputy Speaker leh MLA nibawh chuan, Kolasib District chu ramri depa awm anih avangin, sawrkarin a ngaihsak a pawimawh thu a sawi a.

Kolasib District Hospital chu thenawm district te leh Mizoram State luhka motor kawngpuiin a paltlangna hmun a nih avangin damlo leh accident awm thut pawha pantu an awm thin thu a sawi a. Damdawiin sak lai mek a nih a vangin damlo ward enkawl a hautak thu leh thawktuten harsatna an tawh thin thu a sawi bawk.

Health Minister hian Hospital sak mek a tlawh bakah hian Hospital atana hman lai mekte leh OPD te a tlawh bawk a. Kolasib a panna kawngah Lungdai PHC leh Kawnpui PHC te bakah School of Nursing, Thingdawl a tlawh a. Kolasib Vengthar a Urban PHC dahna turte leh Venglai East a UPHC dahna tur hmun te a tlawh bakah Social Welfare Dept in Vengthar a Integrated Tribal Development Agency (ITDA) an sakna tur hmun te a tlawh bawk.

<><><>

NATIONAL HANDLOOM DAY

Commerce & Industries Minister Pu F. Rodingliana chuan handloom chu Mizo hnam ziarang phochhuahna leh humhimna kawnga hmanraw tangkai tak a ni mek a ni a ti.

He thu hi nimina Millenium Centre Exhibition Hall, Aizawla National Handloom Day vawi 10-na lawmna puala Ministry of Textiles, Govt. of India leh Commerce & Industries Department-te tangkawp buatsaih 'Hathkargha Mela/State Handloom Exhibition', August ni 1 atanga ni 14 thleng aw h tur a hmanpuinaah Minister chuan a sawi a.

Minister chuan Handloom kaltlangin Mizoram hmun hrang hrangah mi eng emaw zatin eizawna ngelnghet an neih phah a ti a. Handloom-in hma a sawn zel theih nan Mizote kutchhuak chawisan leh ngaihhlut nachang hriat chu mi tin mawhphurhna a nih thu sawiin, hnam ziarang nasa zawka phochhuah a nih theih nan Commerce & Industries Department-a thawktute chuan Handloom lam a tui mite an kaihruai fo a pawimawh a ni a ti a. Minister chuan Sawrkarin kuthnathawk, hlawhtlin tuma beitate tha tichak tura tanpuina pek a ngaih pawimawh thu sawiin, Handloom lama tui mi, 'Hand holding Policy' hnuai tanpui tlakte dapchhuah leh tanpui dan tur ruahmanna siam turin thawktute a chah a. Mizo kutchhuak Handloom hrang hrang tih hmasawn nan 'State Handloom Exhibition' chu hlawhtling taka kalpui turin duhsakna a hlan a ni.

State Handloom Exhibition-ah hian dawr 60 an in phochhuak a, tun thla ni 14 thleng a aw h dawn a ni.

<><><>

DISASTER RELIEF FUND

Mizoram Sawrkar chuan kumin May thlaa Cyclone Remal in Mizoram hmun hrang hranga chhiatna a thlen chhawmdawl nan sawrkar laipuih cheng vbc 200 a dil.

Tunhnaia chhiatna hrang hrang thlengah hian mi 37 in nunna an chan a, chhungkaw tam takin an chenna in chhuahsanin hmun hrang hrangah kawngchhia leh bungraw chhia tam tak a awm a ni.

Disaster Management & Rehabilitation Department in RTI zawhna an chhanna an tarlan danin kumin May ni 28-a Cyclone Remal thlipui tleh avanga nunna chan zat chu mi 34 an ni a, heng bakah hian in leh lo a tihchhiat 1,196 awmin heng zingah hian luah tlak tawhloha chhia in 201 a awm a. In chhe nasa 149 awmin thawm that theih maia awm in 699 a awm a, thlam 147 a chhe bawk a ni.

Cyclone Remal in chhiatna hrang hrang a thlenah hian mahni in leh lo chan an awm nual a, heng Cyclone Remal avanga thil chhia hrang hrangte a sum faia a hlut zawng chu cheng nuai 17 bawr vel niin Department chuan a tarlang a.

Nimin piaha National Disaster Management Authority Technical Expert Group lokal te chuan Cyclone Remal avanga chhiatna thleng leh tunhnaia khuarel chhiatna hrang hrang thleng te hi an tlawh kual mek a, naktukah hian an haw leh dawn a ni.

<><><>

HEALTH CARE SCHEME

Mizoram Health Care hman mek chu Mizoram Universal Health Care Scheme-a thlak ala nih loh avangin tun thla thleng pawh sei a ni a, hei hian health care pawisa hmang zo tawh te a huam lovang.

Health Department hotute hnen atanga thudawn danin healthcare scheme thar tur hman theih ala nih loh avangin Health Care Scheme hman mek chu chhonzawm zel tura ruahman a ni a, a bill erawh tihfel hun tur a hriatloh tih sawiin chhinchhiah danah tuna Healthcare scheme hman mekah pawisa la tihfel loh mi 3230 bill, cheng vbc 11 nuai 41 sing 4 & 4,398 a awm mek a, hei hi July ni 18 thlenga chhinchhiah dan a ni.

<><><>

SAMPOORNATA ABHIYAN

Ramchhunga District leh Block hnufual te chhawmdawlina tura sawrkar laipuiin a ruahman Sampoonata Abhiyan chu Lunglei District chhunga mipui zawng zawngin an chhawr theihna turin inhrilhhriat kawngah chak taka hmalak mek a ni.

Lunglei Bawrsap Pu R. Lalthazuala sawi danin thla hmasa ni 5 ah Lunglei District-ah beihpui thlak niin Lungsen block-ah hmalakna chak taka kalpui mek a ni. Hmalakna tur atana thlan chhuah chu mipui vantlang tana hmasawna tur leh changkan theihna tura zaa za thlen tir an tum tih sawiin September thleng awh a nih avangin Line department inrawlh hrang hrang ten theihtawp an chhuah dawn a ni a ti a, hmasawna chak zawk a awm beisei a nih thu sawiin tihhlawhtlin vek a nih chuan hmasawna lian tak a thlen ngei dawn a ni a ti.

Sampoonata Abhiyan hnuaiah hian thla 3 chhungin tehna chi hrang hrang - hriselna lam kaihnhawih, nu naupai hriselna endik, raipuarin chaw tha a dawn dan, BP leh zunthlum kum 30 chunglam test te, Agriculture Department hnuaia Soil Health Card siam te leh Self Help Group ten tanpuina an dawn dan te chu tehna tlangpui tur a ni a.

Sorkar laipui, NITI Aayog hmalakna Sampoonata Abhiyan hi July khan Mizoram chhunga District pathum ah kalpui tan a ni a, September ni 30 thleng kalpui tur niin hetah hian Aspirational Block, RD Block pathum hnufual bik dawm kan ngai thlan chhuah a ni a, Mizorama RD Block pathum Ngopa, Lungsen leh Reiek RD Block-ah te hian thla 3 chhungin hma an sawn theih nan hmalakna hrang hrang kalpui a ni dawn a ni.

<><><>

CHAMPHAI FOREST DIVISION RELEASES GRANTS IN AID

Champhai Forest Division hnuai ramsa in lo leh huan thlai a tihchhiat sak te leh ranvulh a tihhlumsak te hnenah zangnadawmna nimin khan hlan a ni.

He zangnadawmna, grant-in-aid wildlife compensation hi kuthnathawktu mi 17 te hnenah Champhai DFO Pu Lalbiakchama Chawngthu chuan hlan a. Tun tum a grant-in-aid wildlife compensation pekchhuah zawng zawng hi cheng nuai 2 sing 4 sang 9 za 6 sawmruk panga a ni a. Nikum chhung khan mi 6 paruk hnenah wildlife compensation pek niin, a vaia sum pek chhuah zat chu cheng nuai 4 sing 1 sang 6, 500 a ni bawk.

Champhai DFO Pu Lalbiakchama Chawngthu chuan nungchate'n mihringte tana harsatna leh tawrhna an thlenin sorkarin zangnadawmna kum tin a pe chhuak thin tih sawiin, zangnadawmna dilte an dilchhan a dik ngei em tih enfiah a nih hnuah zangnadawmna pek a nih thin thu a sawi a. Zangnadawmna hmu turin dilna rintlak leh a finfiahna, kimchang nen a huna taka thehluh a pawimawh thu a sawi bawk a ni.

Tun dinhmunah buh leh thlai hmun hectare khat zelah cheng 5000 zel zangnadawmna pek theih a ni a. Ramsa in mihringte a beih a vanga nunna chan an awmin cheng nuai 2 pek theih a ni bawk. Ramsa pel avang leh chhahkawlh hmasak avanga hliam tuar emaw, nunna chan an awm chuan zangnadawmna pek theih an ni lo thung a ni.

<><><>

SUPREME COURT ON SC/ST

Supreme Court chuan state thuneitute chu an state chhung Scheduled Castes leh Scheduled Tribes (SC/ST) zingah a hnufual lehzualte qouta pe thei turin thu an nei a ti. Judge pasarih awmna Constitutional bench Chief Justice of India DY Chandrachud-a kaihhruai chuan he thu hi ngaihtuahin judge parukin thutlukna hi an thlawp a. State chhunga SC leh ST te zirna leh sawrkar hnahte chanvo hauhsak kawgnah an dinhmun a zira lo thliar sin leh thei turin state in thuneihna a nei tawh dawn a ni.

<><><>

INDIA & VIETNAM MOU

India leh Vietnam chuan nimin khan thawhdunna tura inremna thuthlung MoU pakua an ziak. MoU an ziahna te hi custom, agriculture, dan leh hrai lam, radio leh television tihchhuahna, hnam ziarang leh khualzin hipna lamah te a ni a. Union Ministry of External Affairs-a Secretary East Jaideep Mazumdar chuan heng inremna ziah anih thu hi New Delhi-a chanchinbumite hmaah a sawi a.

Pu Mazumdar-a sawidanin Prime Minister Narendra Modia leh Vietnam PM Pham Minh Chinh te hi nimin khan New Delhi-ah an inkawm a. Hruaitu pahnihte hian Vietnam-a Nha Trang-a tunhnaia din thar Army Software Park, Telecommunication University ami chu internet kaltlangin an hawng a. He park din nan hian India leh Vietnam te hi an thawkdun a. US Dollar maktaduai nga Vietnam hnenah hian India chuan a pe a ni. Vietnam hi tunhnaia ram economy thang nasa berte zinga mi a ni a.India leh Vietnam insumdawntawwna hi dollar tluklehdingawn 16 hu a ni tawh a ni.

Thuchhuah siamin Prime Minister Narendra Modia pawhin India-Vietnam inlaichinna chu kum 10 chhungin a thukin a ngeth telh telh a ti a. Ram pahnih sumdawntawwna pawh zaa 85 in a thang a ni a ti bawk..



PARIS OLYMPIC

Union Sports Minister Dr. Mansukh Mandaviya chuan Paris Olympics-a ram aiawha tel silai kahthiamte chawimawina hun a buatsaih a. He hunah hian Dr.Mandaviya chuan 10m air pistol mixed team-a Manu Bhaker nena bronze medal latu Sarabjot Singh hnenah cheng nuai 22.5 a hlan a ni.

Pu Mandaviya chuan Khelo India programme hlawhtlinna tarlangin tuna Olympics-a tel infiammi 117 atanginn 70 hi an vawikhat telna a ni a ti a. Mi 28 hi Khelo India atanga inzir chho niin Target Olympic Podium Scheme ami an nih thu a sawi bawk a ni.

Puan tawh angina nimin khan Paris Olympics 2024 ah hian Indian shooter Swapnil Kusale chuan bronze medal a la. Mipa 50m rifle 3 position-ah pathumna niin Indian zinga 50m rifle 3 position-a India tana medal la hmasa ber a ni.

